

鎌山草堂詩合鈔
花王閣賸稿



關西軍實錄
卷之五

19818

鎌
山
草
堂
詩
合
鈔

王光承纂

中
華
書
局

叢書集成初編

鎌山草堂詩合鈔（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

錄山草堂詩合鈔

此據藝海珠塵本
排印初編各叢書
僅有此本

鍊山草堂詩合鈔卷上

王光承纂

光承字玠右江南華亭縣南橋鎮人今分隸奉賢明歲貢生有聲畿社入本朝與弟烈耦耕上海縣之石符里今分隸南匯以隱逸徵不起無後著述散失幾盡

古樂府鏡歌十八首

朱鷺

朱鷺合沓來集王庭梁有魚石繚繚鷺在梁鶴在野手持諫書立鼓下

思悲翁

思悲翁取彼竹實食鳳凰腰如弓首如蓬鳳凰信鷁梟奪我美人枳棘中思悲翁梟母將梟子拉沓高飛隨春風

艾如張

艾而張羅羅且長山有雀煢其黃幡披飛常羊朝獲狐暮獲烏雀獨高飛素雀何嗟彼虞人伏四野視眈眈伊儉亞嘗雀其何不徠下

上之回

上之回龍紛員武騎十八萬馳長風齧浮雲單于來上朝服兩月支稱屬國羣臣受計朝甘泉福祿如茨

億萬年。

翁離

擁離趾中可築室。何以葺之蓬與簞。冬之風。夏之日。霜雪爭出人。東方高。自偃息。

戰城南

戰城南。轉城北。關深日落沙場黑。我爲客豪。見敵安可奔。戰死復何葬。野鳥之腹爲我墳。水深茫茫。蒲葦
芄芄。梟騎委黃沙。驚馬躑躅春草中。縣北第。賜君居。君不識。賜田千頃。君不食。願爲驚馬。驚馬安可爲。願
爲梟騎。梟騎戰不歸。傷子良臣。白骨離離。

巫山高

巫山高。生悲風。淮水深。生蛟龍。步道斷絕。船道不通。去家千里。何時東歸。匪鵠匪鳶。身重不飛。日月白明。
山川自長。遠道之人心茫茫。

上陵

上陵何高高。下津何湯湯。問客從何來。自言水一方。陽侯佐刺船。馮夷爲櫂郎。鮫人榜且歌。朝暮瀟湘。湘
西盡。三巴東。鉅野鴻雁隨山林。載飛載下。曾不知天地之大。神山之宮。光澤何歷。錄鳳爲驂。麟爲服。櫛源
洲。沐陽谷。往來銅池中。芝露皆五色。環坐吹簫笙。萬年壽無極。

將進酒

將進酒。獻重觴。樂嘉賓。拔蘭堂。露夜零。流華光。歌以侑之。雲翔翔。羅千童。紛以歌。東方未明。奈子何。

君馬黃

君馬黃。臣馬駢。二馬齊驅金爵門。兄事歸風弟浮雲。責父寵以東。馬驚車敗。傷哉思美人。造父寵以西。經流沙。涉無草。勤民之力。而有醉飽之心。

芳樹

芳樹何鬱鬱。上有黃鵠徘徊飛。黃鵠藉爲裳。芳樹生光輝。秋風香蠟吹。樹枝黃鵠不可留。哀鳴遠行遊芳樹。與爾秋風亦何仇。吹我枝葉離哉紛。吹我黃鵠散其羣。妬人之人何得焉。舍旃舍旃亦無然。

有所思

有所思。乃在隴坂西。走龍雲鳳錦。乘月裁君衣。日夜望君來。再拜獻遺之。君有他心。涕泣燒其衣。登高山。揚其灰。呼君名。告天地。天地當知之。君從右來我鄉左。君有他心。罪不在我。雞鳴狗吠。兄嫂披衣出。東方漸高。日漸白。看君白日何顏色。

雉子班

雉子班。飛以旋。雉母五。雉子六。雄來從之。乃在南山崑石間。無以我爲驚。驚雉子。踴踴不可止。黃鵠極高。摩天飛。歸來從雌。顧其子。王孫有羅鵠。有雛。艾而張。羅鵠千里。

聖人出

聖人出。紛四海。芝爲車。雲爲蓋。美人來。思遠遊。秋秋跼跼。遨九州。神農虞夏不可求。

上邪

上邪逢君來。合歡無絕衰。千秋萬歲亦誠哉。天柱折。地維缺。東方無日西無月。與君終不絕。

臨高臺

臨高臺。水之湄。下有江離間葦蕀。登高望遠君不知。黃鵠離哉。亂清池。我欲關弓射黃鵠。黃鵠去。水不飛。壽萬年。翔吉時。

遠如期

遠如期。福以介。大莫大山如礪。長莫長。河如帶。匈奴三萬人。稽顙稱臣。奏雅樂。聲陰陰。單于捧觴震澹心。謁者贊引。左右賢王。羅拜闕庭。漢天子。萬年延壽命。

石流

石流如此之離離。清泉東逝。黃鵠西飛。朝暮各異方。石在山之溪。石有蘭兮蘭有香。願以佩之。阻且長。使我佳人永相望。

襄陽蹋銅蹄

襄陽白銅蹄。玉勒黃金羈。馬前何疊疊。揚州遊冶兒。官從襄陽來。最愛襄陽馬。金刀美少年。承恩雙闕下。

前年下揚州。牽衣南陌頭。無將舊人意。朝朝對暮愁。

女兒子

漁陽古道日光低。欲落不落上人衣。
只慣蓮舟不慣馬。髻墮腰環雙淚下。

黃督

陌頭諸年少。春風散馬羣。傾壺花下飲。不顧他鄉人。
求寄故人車。催牛伴不語。前年大隄頭。我亦曾載汝。

楊柳枝

旗亭十里送春思。盡向楊枝訴別離。天南天北無窮恨。壓得長條著地垂。
幾家曲室合歡時。幾處長亭送別離。歡時不見栽楊柳。臨別人人來折枝。

五言古詩

雜詩十一首

秋蘭何冉冉。結根湘水濱。驚飈忽已至。吹我燕山陰。燕山非故鄉。獨行嘗畏人。沉沉白日暮。歌鐘起四鄰。
侯家良宴會。簫管浮春雲。笙歌日以好。天地日以老。悲風西北來。蕭蕭塞百草。棄置何足傷。所傷在遠道。

長歌曲變音久。客人變心。越鳥巢北山。悠悠忘故林。青樓多好女。顧盼輕千金。飛觴沈白晝。歌舞一何深。我有鴛鴦綺。裁爲合歡被。萬里寄君前。棄之如敝屣。聚散各有時。悲泣亦何爲。願君長歡樂。享此黃髮期。長安遊俠客。乘時附青雲。賜第連平樂。出入見威神。蒼頭貫甲冑。門巷比重闔。公卿通請謁。曲室始延賓。主人盛意氣。上客皆逡巡。徐顧開華筵。水陸難具陳。羣倡同春草。供御有土絲。酒酣衆樂作。投壺間六博。盼矚冬枝榮。薄怒春華落。浩浩人事遷。高樓變深壑。妻孥行萬里。一身橫北郭。

西山有仙童。玉醴自斟酌。念我耕稼苦。予我一丸藥。服食不崇朝。身輕如燕雀。乘風上天門。天門張錦幕。上帝方高會。羣真相蒲博。姮娥揮玉杯。宓妃亦善謔。我從草野來。不知此間樂。拜起常疑畏。欲前還復卻。上帝按劍怒。執我加束縛。斥逐歸下土。裸身仍力作。

秋風動木葉。千里起朝涼。念我同心人。乃在天一方。盈盈白玉姿。凜凜當嚴霜。依櫛還採菖。飛鴻集高木。金盞一身多。況乃僮與僕。白衿苦無祛。野宿苦無廬。仰天見明月。明月照單車。宛雉多貴遊。驚馬獨趨趨。兒童前溪來。釣得雙鯉魚。欣然剖鯉魚。其中無素書。平安不可問。垂涕滿長裾。

同居輕歲月。臨別重須臾。中宵戒僕馬。執手且踟躕。明朝異鄉縣。今日猶相見。鴻雁歸有時。遊子去無期。千里或萬里。出門不可知。喔喔羣雞鳴。揮涕從此辭。落葉懷故條。誰能復上枝。悲風爲我作。明月爲我落。列星盡西流。一天皆漠漠。山海限微軀。魂夢能相索。

方壺既靈府。圓嶠亦天都。宮闕遙相望。羣仙羅四隅。築室一何高。植基一何疎。戴之以巨鼇。浮沈與之俱。

金玉盈萬仞。安危託一魚。上帝以爲巧。毋乃成大愚。一朝釣鼈去。兩山皆淪胥。敗戶猶有樞。朽木猶有株。如何龍鳳闕。萬里寄空虛。

薄暮宿上蔡。凌晨出東門。古墓不三尺。翹翹荆與榛。停車問里左。云是霍家墳。五毒備其中。千載無人耕。饑飢夾路啼。野狐當晝鳴。白骨次第出。羣盜權爲薪。帝曰咨巫陽。爲我招其魂。茫茫不可招。俯視惟陰雲。長安小家子。十五入宮門。君王假顏色。富貴若平生。中宵出片言。封侯及六親。婕妤好謝病去。皇后亦路人。白晝望西宮。但見風與雲。一顧使人好。一怒使人老。君恩如流光。豈得長相照。得寵且莫驕。掖庭多年少。蓬萊三萬里。上與青天平。丹藥結爲雲。金玉流爲聲。高芝爲宮闕。棲題宿列星。使者立堂下。銅色而龍形。容成醉且歌。安期舞前楹。麒麟同象豕。鳳凰乃家禽。我欲從之遊。渺渺隔滄溟。蛟魚揚洪波。方舟不可行。不如飲美酒。坐待桑田更。大海成陸道。安步升其庭。

海上五神山。芝田在其中。借問種者誰。乃是東王公。玉母歲一來。列驪乘西風。賓主坐前殿。解馬同歡燕。芝苗紛冉冉。兩驂食其半。主人勃然怒。放之清津岸。王母徒步歸。閉關不相見。龍伯有大人。一朝忽叛亂。五山震且驚。索馬與之戰。此馬久放逸。鞍勒背中斷。束手無奈何。仰天但長嘆。六鼈齧盜糧。羣仙亦廢爨。惜小誤其大。古今以爲患。

七言古詩

漢宮篇

東井咸陽道。西秦函谷關。蕩蕩終南樹。巍巍龍首山。未央宮闕當山起。控引黃河連上時。日月倒臨金馬門。虹霓飛出昆明水。虎威列署接林光。複道排空三百里。後宮臺館更紛紜。懸黎垂棘蕩星文。芙蓉雜畫樓如錦。波弋名香氣似雲。朱檐綠篆瓊瑤榜。翠甍直在青霄上。開戶平看太華峯。垂簾下視仙人掌。仙人玉露濕春風。吹入沈沈桂閣中。蓬萊海月琉璃影。牛女星橋翡翠通。翡翠金輪雲繭織。流蘇細結雙鴻溝。中有姪何諸貴人。窈窕繁華好顏色。軟組輕輿玳瑁裝。麗珂小馬明珠勒。宮婢扶車各往來。永巷相逢不相識。五采翻鴻宛轉絲。粧妝妖服競良時。今日調笙靈女廟。明朝侍宴影娥池。影娥池裏羣山綠。少女微風吹綺縠。弱柳千條映翠眉。奇花萬樹扶膏沐。況兼四海久昇平。朝廷大政委公卿。蓮勺先生嘗頌聖。富平公子作微行。此日中官徵伎樂。此時歌舞換新聲。歌舞名姬天下選。瓊英如雨珠如霰。掖庭祕戲三萬人。江河刀火空中變。別有傾城趙主家。鳳毛步聲初相見。一曲青娥落御筵。六宮粉黛無嬌面。先皇金屋未精奇。掄材新構昭陽殿。昭陽門闔紫霞封。懸錢飛鏹亂鳴鐘。畫閣丹楹三玉鳳。高堂壁帶九金龍。金龍五色擁神仙。結綠珊瑚銀漢邊。百尺樓題鱗甲楸。千人錦繡合宮船。巧窮丁緩迷三象。始出真夷號萬年。月墜月升都白晝。草枯草綠總春天。一家專寵擅椒房。君王夜夜夢高唐。歸風送遠聽皇后。雙鳳離鸞出慶邸。侍女招搖雲母扇。妖童掩映紫犀牀。昭儀常啼帝嘗喜。聯裙並盤花光裏。異錦蛟文賜老奴。綠綈敗篋盛龍子。涎涎燕尾啄皇孫。假父新侯輕許史。自言富貴無窮期。不知一旦皇孫死。露華少嬪滿蒼苔。碧

樹周阿鎖不開。解光細効前朝事。霍莽淒涼棄草萊。飛塵已暗青熊席。踴地離歌赤鳳來。半晴半雨含風開。花落花開月影臺。鴻嘉烜赫桑田改。姊弟騶奢竟誰在。昔日蕭條班婕妤。猶奉園陵倚素車。十年反覆看黃土。執扇優游自著書。

五言律詩

會稽山

禹貢揚州域。當年集萬方。旌旗傳下國。鹵簿畫虛堂。江海東南合。衣冠日月光。至今耕隴上。猶拾古珪璋。

秦望山

山有李斯頌德碑

五十秦皇帝。憑高望故疆。有司除輦道。丞相治文章。山鬼華陰出。神仙海路長。壯遊心已倦。回首亦思鄉。

得友人入蜀信

使星趨益部。猶滯武昌樓。月色疎官柳。天河近客舟。青楓鴻雁信。白帝古今秋。楚蜀三千里。茫茫江水流。

送友人入楚

此地一樽酒。送君千里車。瀟湘飛雁斷。牛斗夜窗虛。客馬長天遠。離人細雨初。吳江通漢水。遮莫有雙魚。

西陵

句踐入臣于吳。羣臣祖之。西陵卽此也。

傷殘諸父老。盡送越王來。夫婦行千里。臣民進一杯。風移亡國恨。鳥識舊君臺。江水無終極。吳宮安在哉。

長門

自得君王寵。芳華不可論。一宮長白晝。六院盡黃昏。珠玉空天下。風雲傍至尊。事知十載後。揮涕買長門。

懷金天石

落落金天石。才名勝我曹。長空飛獨鶴。短褐對羣豪。蘭思盈江水。秋風蕩楚騷。十年成一賦。詞客近如毛。

夜坐懷何次張

何子栖南浦。村人不識名。大山雲外立。小艇月中行。鳥宿侵花氣。鐘疎度雨聲。知君當夜咏。秋思一江清。

西陵

范蠡屯兵處。相傳在上岡。龍文來鑄浦。虎氣壓錢塘。月照殘軍壘。風生古戰場。大江同往昔。列國幾興亡。

土城村

吳越春秋。越王得西施三年。學服土城村。而獻吳王。卽此也。今在五雲門外。

新築西施館。名倡教鼓琴。關山馳白羽。閨閣費黃金。賤妾三年舞。君王一片心。時危憑女子。花霧土城深。

石門

古女陽亭也。

勾踐行成日。單車此地過。甲兵三戰盡。臣僕一身多。石室中宵泣。蘇臺永夜歌。十年還躍馬。囚虜竟如何。

贈剡新令二首甲申

使君來下邑。終日聽流泉。事簡庭栖鹿。山深吏學仙。縣當神女宅。人在永平年。自有雙飛鳥。無勞刻水船。才子今何在。行春曲水涯。河陽無雜樹。山澗盡桃花。烟霧郎官履。雲護百姓家。遊人新適館。授粲有胡麻。

同羣帥飲台州使君山亭

文武皆邦憲。銜杯共此亭。山花迎畫戟。野鳥下公庭。露冕行春草。橫刀看落星。不知逢掖賤。高唱數峯青。

早過斗城

雲林不可辨。始信客途艱。大路橫千樹。孤城託萬山。鐘鳴梁國寺。月抱漢時關。僕馬凌霜度。蕭蕭鬢欲斑。

山鄰

山曲有東鄰。園亭護小春。水深明碧藻。松老駁蒼鱗。魚鳥時窺客。雲霞欲近人。頻攜一樽酒。慰我問之濱。

家君掛冠避地董村董村剡東之至僻者也待行二首

解綬離官舍。驅馳叢棘中。懸崖一以斷。星漢不相通。木魅溪前火。山神馬後風。從人多戰栗。偶語怨而翁。此地稱奇僻。綠崖上碧空。弟兄千里外。父子萬山中。野店龍王井。深林虎徭風。家君偏嘯傲。不肯泣途窮。

懷天則上人

念爾嘗枯坐。蕭條古寺風。閑門千劫外。清磬一聲通。松桂寒支遁。龍蛇雜遠公。天花詩思裏。駘蕩落江東。

剡溪夜行三首

蕭蕭飛鴻羽。迢迢逐水流。暮雲遮斷浦。暝色上高丘。誰是戴安道。空勞王子猷。明知興已盡。無處可歸舟。輕橈乘早發。薄暮尚沈浮。宿鳥時驚月。前山欲斷舟。星雲連海氣。烟火帶楓秋。小嶺無人借。空尋古沃洲。野舟何處宿。夜色滿平沙。寺遠鐘聲細。溪迴漁火斜。雲深迷客路。烟起辨人家。杜若無聊賴。離披託晚霞。

山中夜坐憶紀生

孤客憑高坐。疎鐘落塞鴻。四山人語靜。一月照虛空。天地同寒水。鄉關共遠風。仲容三百里。知在雁聲中。

羣帥

羣帥稱強勇。連營慰聖朝。國家輕爵土。七校盡金貂。賜馬馳前殿。橫旗出大橋。燕然高幾里。仍欲問嫖姚。

禹穴

禹穴高岡上。東西費討尋。千年藏日御。萬象入山陰。地迴丹書合。天迴牛斗深。略知探舊跡。已足霸詞林。

席上贈王將軍三首

綠幘少年裝。還家髮半黃。寶刀忘歲月。戰馬死疆場。殘夜明孤燭。雄心盡一觴。錦袍今百結。猶裹舊時瘡。慷慨辭軍幕。蕭條返故鄉。金戈秋月冷。大樹暮雲長。部曲皆豪貴。妻孥半死喪。國家求舊將。寶劍尚光銑。將軍猶老健。拱手謝戎行。天子不復問。公卿亦已忘。悲歌燕市酒。躡鞠少年場。搔首西風裏。平原看騶驎。

飲章安郡廨

漂泊江湖客。稍栖月桂樓。十年驅病馬。一雁路寒洲。詞賦嗟梁苑。笙歌到楚囚。悲吟驚滿座。謂我欲何求。

家事二首

扶桑驚落葉。海水亦羣飛。龍伯移山去。家君解組歸。壯年趨虎觀。垂老臥牛衣。有子皆飄泊。何人慰少微。雲物寄長嗟。浮生託白沙。市朝皆走馬。兄弟盡無家。苦雨侵常棣。秋風冷桂華。力耕人半老。何以答農畝。